

可齋續藁

二四



詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官學正臣湯垣

謄錄監生臣萬朝宗

欽定四庫全書

可齋續藁後卷九

宋 李曾伯 撰

奏申

回宣諭奏

臣三月十四日承閣長劉躋三月初一日午時恭奉聖
旨宣諭蒙寇已為楊大洲所殺此一大機令臣遍諭諸
州亟報諸蠻曰蒙寇已死諸頭目已降蜀中諸城已克
復山東河南諸郡頭目亦已歸順庶可以作其氣而大

理羅殿之餘寇亟令併力掃蕩此破竹之勢耳事定後如大理諸國未有後者合與立後部落之已散者合與安集可條具以聞臣竊惟自有天地即有華夏是雖帝王盛世不能無邊患然黃旗紫蓋運在東南中國正朔繫焉自古北寇其有傾國之力以肆侵軼者非惟弗克以逞志每多不戢而自焚如苻堅之淝水逆亮之采石是也皇天眷佑我宋烜赫厥靈恭惟陛下布昭聖武日新其德蠢爾小寇敢於裒兇鞠頑干犯王畧窺我蜀道

亦既孔熾大淵乃能以匕首殺之卒如司馬遷所謂得
其當以報漢此非人力實天亡此敵也敢拜手為陛下
賀臣所準旨諭已恭錄遍剗邕宜融欽諸邊郡各令遵
奉施行乃若大理部落興滅繼絕之事使稍定體訪續
具奏聞又準聖諭敵已亡矣此正天假中國自治之歲
月如招軍如築城如浚濠如塞支逕如築關隘等事愈
不可一日緩令臣照節次已降諭旨亟圖之臣仰見陛
下不以李龍之死為幸猶以得臣之在為虞一敵死一

敵生彼此迭相雄長憂固未艾乘此一日之暇圖維自治忱不可緩所有招軍築城浚濠塞支逕築關隘臣見此排日催趣諸郡趁時措置以期上寬天顧亦既隨事節節見之具奏今再當恭奉諭旨行下督趣之矣伏乞睿照

回宣諭奏

臣三月二十二日伏準御前庚遞承閣長劉遵三月十三日未時恭傳聖旨宣諭以臣近嬰賤疾上軫聖懷賜

臣天雄附子川鳥各三十隻鍾乳粉陽起石人參各三十兩臣謹已望闕遙拜祇受訖已別具手奏稱謝外臣無任感天荷聖之至臣所準旨諭秋風非遠備禦宜先謝濟結約諸蠻必有定說諸州城築必已辦惟賓柳方興工未久切須督之劉雄飛任責諸闕隘想已有次第皆不容緩也臣仰見陛下圖回邊慮先事豫防無日不討諸軍實而申儆之意謝濟自二月十三日離桂林廿三日至邕州近得其書三月初三日離邕州初八日過

老鼠隘雄飛亦委其呼集峒丁同官軍點視修葺老鼠
募化等處臣見趣其親出橫山之外結約溪峒措置關
隘未見申到度其必有區處諸州城築則臣已節節奏
申邕見加浚城濠融宜欽三城皆促增修浚欽則朝廷
見科五十萬融則本司近撥十五萬宜則本司近撥十
萬融宜兩項皆朝廷舊科與融州錢俾令為工役之費柳州則已準朝
廷科撥百萬之請未到本司見那撥應副惟賓則無力
可以城築劉士龍方與陳杰兩易杰猶未到已促令前

往措置關隘為保民計靜江城池則臣增築新城已漸就緒惟舊城尚費工役然隨宜補葺亦已大勝舊歲出月當繪圖本及開具支費供申朝廷矣雄飛任責諸關本司排日催促近據申到分差將校同溪峒頭目前往左右兩江諸關整葺共二十五處已於三月十六日以其狀真本繳申朝廷矣今當恭奉聖旨再劄諸郡催促謹不敢緩又準聖諭近日間探不明敵報不的邕州去大理本不遠令臣密遣人到地所審問敵兵之在大理

者實有若干人知其實數便可禦之臣謹按靜江府圖志自橫山至自杞凡六十八程其下注云又一日至大理界及謝濟往年自邕州起程至大理國都却止於六十程

地里一本
繳連在前

閱其地里自邕至特磨連二十五程自

特磨至大理又三十五程共計三千九百二十里前後

廣西遣間多是能至特磨少能至大理者蓋沿途諸蠻隔絕不易通也臣自去冬遣吳以忠及聞邕州亦遣梁材令深入體探皆不過至特磨界而還以忠所探已嘗

繳申朝廷謂去冬敵兵侵入橫山寨多以病死兀郎骨
解亦以病歸此則天之佑中國也然未知見屯大理兵
數多寡但報兀郎遣其子親往其主處亦未知所請何
事知蠻地識蠻情無如謝濟臣當再奉聖旨促其領管
差人往探的實矣臣又準聖諭臣已發回戍兵四千人
而新軍未知有幾民兵峒丁果可伏否今歲秋防更增
兵否可便斟酌奏聞天下事以預備為上也臣初以冠
兵既退邊糧宜省本欲於見戍兵內將近地人撤回一

半俾令拆洗繼以春初得報敵之後哨猶在歸化且邕
州方有濟師之請而桂柳邕欽諸郡又皆有修浚工役
民夫既各歸耕官軍不容盡虛以此僅能調鄒進吳琪
等四千人過黃平并雷廉化兵民船一千餘人放令拆
洗共五千人見今邕桂各不過屯戍五千餘兵耳宜融
欽柳四郡留戍多者千餘人少只數百秋防相去不遠
只得留之措置防守以此未敢輕摘所有新招安邊右
軍已及六百人口逐招刺見措置造寨以處之但此軍

新集未堪調戰蒐練年歲方可備用如民兵峒丁則臣
三月初十日已嘗奏聞此項民兵須是朝廷稍損所費
使諸州有以贍之方不為虛言乞留聖意所有秋防增
兵臣正欲申請近見雄飛具申於朝邕之一州自乞增
兵作萬五千人已嘗為之繳申邕去橫山七日表裏關
隘不一縱不及其數非得精兵一萬不可此外桂融宜
欽去年兵數皆少幸而寇所不至今且以宜欽皆屯三
千人融柳二千人賓關千人靜江亦領得萬兵上下通

約三萬人乃可僅僅分布此外兵非不欲多而糧不能多者也却只得藉民兵與新兵添助大抵全藉宗社洪福以保無虞上項所請臣未敢見之公奏臣之管見但乞朝廷多調一項精兵屯之湖南境上使之就糧俟秋防將動覘敵所向以為沅靖邕廣之應且免士卒冒暑入瘴之患茲為得策更乞聖裁

回奏庚遞宣諭

臣今月二十四日又準庚遞承閣長劉燾三月十五日

申時恭奉聖旨宣諭仰蒙睿念以臣氣體雖安尚未全
愈令加調攝仰見陛下天地其德父母此心軫恤之隆
可謂備至臣感激不覺涕隕又蒙聖諭謂嘗推測臣賤
命三四月間雖有微災此去修程未易量此又陛下保
全臣子期以終吉之意臣自揆庸陋誤被簡知取數已
多揣分當止蓋自壬子歲以來懇祈休致非止一疏聖
恩未忍捐棄再備蕃宣今歲二運交併必知灾咎一疾
踰月雖幸痊安而氣體為之愈衰瘴根猶恐再發此臣

之所以祈憐乞骸也此去未量之訓是雖造命出於君父而臣老弗勝任豈復更有過望所願陛下始終生全之賜伏準聖諭融州開濠柳州築城並與科降皆如臣申到計料之數並無裁減尤見朝廷委信之篤臣所申計料乃是據兩郡守臣所申每戒其務實不可虛破今蒙朝廷如數應之各郡自當竭力措辦更復何說下半年戍兵分錢臣未敢申請已蒙外庭與之呈科此皆陛下主張扶持之力邊鄙幸甚俟得指揮即當遣人闕請